



**Gemeinsam Äntwert vun der Madamm Justizministesch, Elisabeth MARGUE a vum Här Inneminister, Léon GLODEN, op d'parlamentaresch Fro n°1344 vum 10. Oktober 2024 vun der honorabeler Députéierter Liz BRAZ a vum honorabelen Députéierten Ben POLIDORI zum Sujet "Lutte contre la cybercriminalité".**

**Ad 1) an 2)**

D'Unzuel u Cyberattaque sinn an de leschte Joere souwuel zu Lëtzebuerg wéi och a ganz Europa staark geklommen. Wat d'Zuel vun de Fäll vu Phishing zu Lëtzebuerg ugeet, ass dës vu 27 Fäll am Joer 2020 op 1324 Fäll am Joer 2023 eropgaangen. Fir Spoofing ginn an dem Kontext aktuell keng Statistiken gefouert, wëll et sech hei ëm ee vu ville Moyenen handelt, déi et erméiglechen méi gläwderdeg bei engem potenzieller Affer eriwwerzekommen an z.B. eben eng sougenannte Phishing-Attack erfollegräich duerchzeféieren.

D'Zuelen am Zesummenhang mat Phishing-Attacken pro Joer zu Lëtzebuerg sinn hei drënner ze fannen:

**Affaires nouvelles**

<b>Année*</b>	<b>2020</b>	<b>2021</b>	<b>2022</b>	<b>2023</b>	<b>2024 (-2/10)</b>
Parquet de Luxembourg	26	41	659	1076	806
Parquet de Diekirch	1	1	0	248	65
<b>Total</b>	<b>27</b>	<b>42</b>	<b>659</b>	<b>1324</b>	<b>871</b>

*\*Année de prise en charge de l'affaire.*

Bei bal all de Fäll fir d'Period tëschent de Joren 2020 an 2024 handelt et sech ëm em Affären bei denen den Auteur onbekannt ass. Et ass bis elo hei zu Lëtzebuerg nach net zu enger Verurteilung fir déi Zort Infraktioun komm. Grond dofir ass, dass d'Auteurs vun dësen Attacken gréisstendeels aus dem Ausland agéieren a mat Hëllef vun techneschen Moyenen, déi verhënneren, dass een se kéint identifizéieren. Doduerch sinn d'Enquêtes extrem komplex a langwierig, well d'Justizautoriteiten op d'Zesummenaarbecht aus dem Ausland ugewise sinn.

De Moment gëtt intensiv un der Ëmsetzung vun der E-evidence Directive geschafft, déi den Justizautoriteiten op EU-Niveau an dem Kader d'Aarbecht wäert vereinfachen.

Säitens der Police gi keng eenzel a spezifesch automatiséiert Statistiken zu de Phenomener vu Phishing a Spoofing geféiert. Sämtlech Kommissariater an d'Sektione "Criminalité générale" a "Cybercrime" vum SPJ kënnen esou Plainten entgéint huelen, respektiv traitéieren. An den Datebanken zu judiciaire Faite ass keng spezifesch Ënnerdeelung vun den Escroquerien virgesinn, kohärent mam Code Pénal, dee keen Ënnerscheid mécht.



### **Ad 3)**

Aktuell këmmere sech beim Parquet Lëtzebuerg eng Ekipp vun 3 a beim Parquet Dikrech eng Ekipp vun 2 Leit ëm Cyberdossieren. Et ass evident, datt de Parquet allgemeng méi Personal brauch an dofir gouf mam Gesetz vum 24. Juli 2024 eng ganz wichteg Etapp fir eng Rekrutierungsoffensiv an der Magistratur geholl. Dëst Gesetz schaaft 94 zousätzlech Posten an der Magistratur an de Joren 2024/2025 bis 2026/2027 an 20 zousätzlech Attachéposten. Weider Projeten fir méi Posten a fir d'Rekrutement an der Magistratur ze fërderen, sinn och schonns um Instanzeweeg bzw. an der Maach.

### **Ad 4)**

Fir d'Regierung ass e moderne Police-Corps eng Prioritéit. Eng modern Police baséiert op 3 Pilieren:

- Genuch Leit
- Modernt Material
- Adequat Infrastrukturen

Op deenen 3 Achse gëtt konsequent geschafft.

Wat d'Personal ugeet, erënnert den Inneministère drun, dass de 24. Abrëll vun dësem Joer 170 nei Polizisten a Polizistinnen hiren Eed ofgeluecht hunn. Doduerch konnt d'Police zënter Laangem reell verstärkt ginn: No Ofzuch vun ënner anerem de pensiounsbedéngten Departen bedeit dat en Netto-Plus vu ronn 90 Polizisten. Ronn een Drëttel vun deenen 90 Beamten ass an de Service de Police judiciaire affectéiert ginn.

Op ee Joer gekuckt, presentéiert sech d'Personalevolutioun am Service de Police judiciaire folgendermoossen: Zënter November 2023 si 54 Leit bäikomm: 29 Polizisten an 25 Zivilisten, dorënner och Leit fir d'Beräicher vun der Finanz- a vun der Cyberkriminalitéit. Dëse Recrutement ass esou am Koalitiounsaccord virgesinn: *“La Police judiciaire sera renforcée, notamment dans la lutte contre la criminalité économique et financière”*.

De generelle Recrutement gëtt virugefouert, an dat nach méi konsequent: Kuerz no der Ernennung vum Inneminister ass d'Zuel vu Kandidate pro Kontingent/Promotioun vun 160 op 200 eropgesat ginn. An dësem Kontext sief och un déi nei Informatiouns- a Sensibilisatioucampagne fir C1- a B1-Posten erënnert, déi virun e puer Wochen ugelaft ass.

Niewent dem generelle Recrutement gëtt och ganz gezielt rekrutiert, well a ganz spezifesch Beräicher héich spezialiséiert Personal gebraucht gëtt: zum Beispill, wéi méi wäit uewe scho geschriwwen, an de Beräicher vun der Finanz- a vun der Cyberkriminalitéit. Aktuell ginn d'Besoinen a Saachen Digitalisatioun evaluéiert.



D'Regierung ass deemno amgaangen, d'Police an d'Lag ze versetzen, mat der permanenter Evolutioun vun der Kriminalitéit kënnen Schrëtt ze halen, sou wéi et am Koalitiounsaccord virgesinn ass: *“Le Gouvernement mettra à disposition des entités de poursuite nationales les ressources personnelles et matérielles requises pour lutter contre la cybercriminalité”*.

Lëtzebuerg, den 13 November 2024.

D' Justizministesch

(s.) Elisabeth Margue